

THUTO YA DORDT

PHETŠO YA SINOTE SA SETŠHABA SA KEREKE YA GERE-FORMEERD YA NEDERLAND YE E SWERWEGO MO DORD-RECHT MENGWAGENG 1618 - 1619, MABAPI LE PHAPANO DITHUTHONG TSE TLHANO DIKEREKENG TSA NEDERLAND.

THUTO YA PELE

GO KGETHWA LE GO LAHLWA KE MODIMO

1. Batho bohole ba sentše ka Adama, ba ikweditše sebeng, gomme ba ipofile thogakong le lehung le le sa felego. Ka baka leo, Modimo o be a ka se be a dirile motho gampe ge a ka be a tlogetše batho ka moka sebeng le thogakong, le go ba ahlola ka baka le sebe. Moapostola Paulo o re: *Lefase ka moka le tle le be le molato go Modimo. Bohle ba dirile dibe, mme ba hlaeletwa ke letago la Modimo* (Baroma 3:19,23). *Gobane moputšo wa sebe ke lehu* (Baroma 6:23).

2. Eupša *lerato la* Modimo le a re ratilego ka lona, le bonagetše ka ge a romile Morwa wa gagwe motswalwanoši lefaseng gore e'mongwe le e mongwe yo a dumelago go yena, a se ke a lahlega, eupša a be le bophelo bjo bo sa felego (1 Joh. 4:9; Joh. 3:16).

3. Gore batho ba tlišwe tumelong, Modimo ka kgaugelo ya gagwe a roma bagaši go gaša molaetsa wo wa lethabo go batho bao a ba ratago, ka nako yeo a ratago ka yona. Ka mediro ya bona, batho ba biletšwa tshokologong le tumelong go Kriste, mmapolwa. *Gobane ba tla dumela bjang go yo ba sešogo ba kwa tsa gagwe? Mme ba tla kwa bjang ge go se segoledi?* *Gomme ba ka goeleta bjang ge ba sa rongwe?* (Baroma 10:14,15).

4. Kgalefo ya Modimo e dula e okametše ba ba sa dumelego ebangedi ye; eupša ba ba dumelago ebangedi le go amogela Mophološi Jesu ka tumelo ya nnete le ye e phelago, bona ba hunollwa ke yena kgalefong ya Modimo le tshenyegong. mme o ba fa bophelo bjo bo sa felego (Joh. 3:16; Mar. 16:16).

5. Molato wa go hloka tumelo, le molato wa dibe tšohle ga o tšwe go Modimo, eupša o tšwa go motho. Eupša tumelo go Jesu kriste le phološo e humanwago go yena ke neo ya kgaugelo ya Modimo. Go ngwadilwe gwa thwe: *Gobane ka kgaugelo le phološitšwe ka tumelo me seo ga se tšwe go lena, ke mpho ya Modimo* (Baef. 2:8). Ka ona mokgwa wo: *Le filwe kgaugelo...ya go dumela go Kriste* (Bafil. 1:29).

6. Taba ya gore ba bangwe ba fiwe tumelo ke Modimo, ba bangwe ba se ke ba fiwa tumelo, e tšwa morerong o sa felego wa Modimo. Gobane go *tloga mehleng le mehla Modimo o tsebile mediro ya gagwe ka moka* (Dit. 15:18). *Gomme o dira tšohle ka morero wa thato ya gagwe* (Baef. 1:11).

Go ya ka morero wo o nolofatša dipelo tša bakgethwa ka kgaugelo, le ge di le thata, o di sekamišetša tumelong. Eupša ba ba sego ba kgethwa, o ba tlogela bokgopong le bothateng bja bona go ya kahlolong ya gagwe ye e lokilego. Moo morerong wo ke moo re utollelwago gabotse kgethologanyo magareng ga batho bao ba lahlegilego ka go swana. Kgethologanyo ye ke ye e tebilego le ya kgaugelo le ye e lokilego. Ke phetšo ya kgetho le tahlo ye e utollwago Lentšung la Modimo. Batho ba kgopo le ba ba tšhilafetšego le ba ba tekatekago ba phetla thuto ye go iša tshenyegong ya bona beng. Eupša go ba bakgethwa le ba boifago Modimo, e ba fa khomotšo e sa lekanywego.

7. Kgetho yé, ke morero wa Modimo wo o sa fetogego. Go ya ka morero wo, Modimo o keghile sehiophha se itšeng sa batho go batho bohole pele ga popo ya lefase. Bakgethwa ba ga ba fete ba bangwe ka toko, eupša ba madimabeng a swanago le a bona. Ba tšwile tokong ya bona ya mathomo, mme ba wela sebeng le timelong ka baka la molato wa bona.

Le ge go le bjalo o ba kgethetše phološo go Kriste, ka kgahlego ya thato ya gagwe le ka kgaugelo fela. Modimo o beile Kriste go ba Mmoelanyi le Hlogo ya bakgethwa le go ba motheo wa phološo, go tloga neng le neng.

O rerile go neela bakgethwa go Kriste, gore a ba phološe.

Modimo o bitša le go goga bakgethwa ka maatla a Lentšu le Moya wa gagwe gore ba kopane le Kriste. Modimo o rerile go neela bakgethwa tumelo ya nnete go Kriste.

O rerile go ba lokafatša le go ba kgetha.

O rerile gore mafeleiong a tagafatše bao ba bolokegilego ka matla kopanong le Morwa wa gagwe, e le tšhupo ya lešoko la gagwe le go ba tumišo ya kgaugelo ya gagwe e tletšego. Ka mo go ngwadilwego: *Ka mo a re kgethilego ka yena Kriste mola lefase le sešo la thewa, gore re be bakgethwa, le ba ba se nago bosodi pele ga gagwe. leratong la gagwe o re hlaoretše go ba bana ba gagwe ka Jesu Kriste, ka go ikgahlela ga thato ya gagwe, gore go retwe letago la kgaugelo ya gagwe, yeo a re gaugetšego ka*

yona mo go Morategi (Baef. 1:4,5,6). Ba a bego a ba hlaotše, ke bona a ba buditšego. Ba a ba buditšego o ba lokafadiše. Ba a ba lokafadišego o ba file letago (Barom. 8:30).

8. Kgetho ye, ga se ya mehutahuta, eupša ke e tee e swanago go bohole ba ba phološwago Testamenteng e Tala bjalo ka Testamenteng e Mpsha. Lengwalo le re šupa kgahlišo, sepheto le keletšo e tee fela ya thato ya Modimo ka mo a re kgethilego go tlogela go sa felego. O re kgethetše kgaugelong, tagišong, phološong, ešita le tseleng ya phološo ye a e lokišitšego, gore re sepele ka yona (Baef. 1:4,5 le 2:10).

9. Kgetho ye, ga se ya thongwa ka baka la tumelo ye e ileng ya bonwa e sa le pele, goba ka baka la boikokobetšo bja tumelo, goba ka baka la bokgethwa goba ka baka la maema a mangwe goba a mangwe a mabotse a motho. Dilo tše e be e se ona mabaka a kgetho ya motho. Go be go sa lebelewla gore motho a be le tšona pele a ka kgethwa. Eupša o kgethetše tumelo, go kwa, kgethego, bjalo-bjalo. Ka baka leo, kgetho ke mohlodi mo go tšwago dilo tšohle tše di phološago, mo go tšwago tumelo, kgethego le dilo tše dingwe tša dimpho tša kgethego, gomme mafelelong bophelo bjo bo sa felego go ba dikenywa tše di tšwago moo. Moapostola o hlatsa ka gore: Re kgethiwe go ba bakgethwa, ba ba se nago bosodi pele ga gagwe (Baef. 1:4). Se se šupa gore o re kgethetše tše re bego re se re be tšona.

10. Lebaka la kgetho ye ya kgaugelo ke kgahlišo ya Modimo fela; gomme ga se a lebelela boemo goba mešomo ya motho go ba tekanyo ya kgaugelo ya kgethego; eupša yena o kgethile batho ba a ba amogetšego go ba leruo la gagwe gare ga mašabašaba a ba-dira-dibe. Go ngwadilwe gore: *Bana mola ba sešo ba belegwa ba sešo ba dira botse le bobe, Rebeka o boditše gore yo mogolo o tlo hlankela yo monyane. Ka fao go ngwadilwe gwa thwe: Nna ke rata Jakobo; ge e le Esau ke mo tšwile* (Barom. 9:11,12,13). Gomme: *Gwa dumela bohlę ba ba hlaoletšwego bophelo bjo bo sa felego* (Dit. 13:48).

11. Modimo o bohlalebjohle, ga a fetoge, o tseba tšohle e bile o maatlaohle. Ka baka leo kgetho ye e ka se ke ya dirollwa, e ka se ke ya dirwa gape, goba go fetolwa, goba go latolwa, goba go robjwa. Bakgethwa ba ka se ke ba lahlwa goba go fokotšwa.

12. Bakgethwa ba tiisetšwa ka nako e nepagetšego ya kgetho ya bona ya neng le neng, ye e sa kgonego go fetoga. Tiisetšo ye e direga ka mekgwa e e fapanego le ka kelo e e sa lekanego. Tiisetšo ye ga ba e amogele ka go nyakiša boteng bja ditsela tša Modimo tše di utilwego.

Eupša ba e hwetša ge ba bona ka bobona ka lethabo dikenya
tša makgonthe tša kgetho bjalo ka ge re šupetšwa Lentšung la Modimo.
Dikenya tša tša kgetho ke tumelo go Kriste. Poifo ya bobjana go
Modimo. Sello go Modimo ka baka la dibe, tlala le lenyore la toka,
bjalo-bjalo.

13. Maikutlong le tiišetšong ye ya kgetho ye bana ba Modimo ba
hwetšago lebaka leo ka lona ka mehla ba swanetšego go ikokobetša pele
ga Modimo ka letšatši le letšatši go rapela boteng bja dikgaugelo tša
gagwe; le go itlhwekišetša yena, yena yo a ba ratilego pele ka lerato le
lekaaka, gomme le bona ka lehlakoreng la bona ba mo rata ka lerato le
tukago. Ga go kgonege gore thuto ye ya kgetho le kelelo ya yona e dire
gore bana ba Modimo ba emiše go boloka melao ya Modimo, goba gona
go se e êlê tlhoko ka go phelela sebeng. Go ya ka kahlolo-toka ya
Modimo, ke molato go bao ba itšeelago kgaugelo ya Modimo ya kgetho
ka go se hlokomele, goba ba bolela ka yona feela, kantle ga thaloganyo
le go duma go sepela tseleng ya bakgethwa.

14. Thuto ye ya kgetho ya bo-Modimo ye e yago ka go latela
merero ya bohlale bja Modimo e boletšwe ke baporofeta le ke Kriste ka
nnoši gammogo le ke baapostola Testamenteng e Tala le e Mpsha. Mme
ya tsebišwa le go bolokwa Mangwalong a Makgethwa. Ka baka leo le
lehono thuto ye e swanetše go hlaološwa kerekeng ya Modimo ka nako le
tulo e loketšego – go ya ka mo e laoletšwego ka gona. Thuto ye e
swanetše go rutwa ka tlhokomelo le ka poifo le tlhompho e kgethwa ya
Modimo, e sego ka go rata go tseba le go nyakišša ditseleng tša yo
godimo-dimo. Tše ka moka di swanetše go dirwa ka go hlompha le go
godisha Leina le lekgethwa la Modimo le gona go iša khomotšong ye e
phelago go setšhaba sa gagwe (Dit. 20:27; Barom. 12:3 le kgaolo ya
11:33,34; Baheb. 6:17,18).

15. Ga se bohole ba kgethilwego. Ba bangwe ga se ba ka ba
kgethwa goba ba fetwa kgethong e sa feleng ya Modimo. Taba ye e hla-
tsiwa ka mokgwa o kwalagalago ke Mangwalo a Makgethwa. Modimo o
rerile gore ba dule madimabeng a bona. O rerile bjalo go ya ka thato ya
gagwe e lokologilego, ya toka le eo e se nago bosodi e bilego e sa
fetogego. Madimabeng ao ba itahletše go ona ka molato wa bona.
Modimo o rerile go se ba fe tumelo yeo e phološago le kgaugelo ya gore
ba sokologe.

Go laetša toka ya gagwe, Modimo o rerile go dumelela batho ba go

ikgethela ditsela tša bona. O rerile gore ba dule tlase ga kahlolo ya gagwe e lokilego, le go ba ahlolela kotlo e sa feleng, e sego fela ka baka la gó se dumele ga bona eupša le ka baka la dibe tša bona tše dingwe ka moka.

Morero wo wa tahlo ga o dire gore Modimo ke mohlodi wa sebe le gatee, gobane kgopolo e bjalo ke ye e rogago Modimo. Morero wo o šupa gore Modimo ke moahlodi yo a tšhabegago le yo a se nego bosodi e bilego a lokile, yo a ôtlago sebe.

16. Bao ba se tšwego ba ekwa tumelo e phelago goba tshepho e tiilego go Kriste; goba ba se tšwego ba ekwa khutšo moyeng; goba ba se nego boikokobetšo bja bobjana le yona tumišo go Modimo ka Kriste, ba se ke ba fela maatla ge ba ekwa ka ga tahlo.

Ba se ke ba gopola gore ba wela ka tlase go ba lahlilwego eupša ba šomiše dišomišiwa tše di tshephišitšwego ke Modimo, go diragatša dilo tše ka moka ka go rena. Ka fao ba swanetše go phegelela go šomiša dišomišiwa tše, le go letela ka phišego le tihompho le boikokobetšo nako ya kgaugelo e kgolo.

Bao ba dumago e le ka nnete go sokologela go Modimo, go theeletša yena fela le go phološwa mmeleng wa lehu, eupša ba se ba fihla felo mo ba ratago go ya gona tseleng ya borapedi le tumelo, ba swanetše go se tšhošwe le ga nnyane ke thuto ye ya tahlo. Modimo wa kgaugelo o tshephišitše gore *lehlaka le le tenegilego a ka se ke a le thokgela sa ruri, mme lebonenyana le kunyelelago a ka se le timele sa ruri.* (Jes. 42:3).

Eupša thuto ye ke setšošo sa nnete go bao ka moka ba nyatšago Modimo le Mophološi, Jesu Kriste, mme ba ineēla ka gohle-gohle ditabeng tša lefase le ditumo tše mpe tša nama. Go tla ba bjalo ge ba sa ntše ba gana go sokologela go Modimo ka nnete.

17. Lentšu la Modimo, leo go lona re ithutago thato ya Modimo, le hlatsa gore bana ba badumedi ke ba bakgethwa. Ga se ba bakgethwa ka thlago, eupša ke ba bakgethwa ka baka la kgwerano ya kgaugelo yeo ba amogetšwego go yona mmogo le batswadi ba bona.

Ka baka leo batswadi ba badumedi ba se ke ba belaela gore bana ba bona ba kgethiliwe mme ba phološitswe, le ge Modimo a tšea bana ba bona e sa le ba bannyane (Gen. 17:7; Dit. 2:39; 1 Bakor. 7:14).

18. Go bao ba ngongoregago ka kgaugelo ye ya kgetho yeo e amogetšwego feela le ka bothata bja tahlo e lokilego, re ba araba ka mantšu a moapostola ge a re: *Aowii, wena motho o mang ge o tšea kgang*

le Modimo (Barom. 9:20); le ka mantšu a Mophološi yo a itšego: *Goba a ga go a ntshwanela go dira ka tša ka ka mo ke ratago ka gona?* (Mat. 20:15). Eupša ge e le rena bao re rapelago diphiri tše ka go boifa le go hlompha Modimo, re bolela bjalo ka Moapostola yo o itšego: *A! Bodiba bja lehumo, le bja bohlale, le bja tsebo ya Modimo!* *Dikahlolo tša gagwe ga di lemogiwe me ditsela tša gagwe ga di latišege!* *Gobane ke mang yo a tsebilego kgopolo ya Morena, goba ke mang yo a bilego moeletši wa gagwe?* *Goba ke mang yo a mo filego pele, gore a tle a bušetšwe?* *Gobane tšohle di tšwa go yena, di ka yena, di ya go yena.* *Letago a e be la gagwe ka go sa felego!* Amene. (Barom. 11:33-36).

TATOLO YA BOKGELOGI BJO BO ILEGO BJA FEREKANYA DIKEREKE TŠA NEDERLANE KA NAKO E ITŠENG.

Bjale ka ge thuto ye ya kgetho le tahlo e hlaolositšwe go ya ka Lentšu la Modimo, sinote se latola bokgelogi bja batho ba ba rutago tše latelang:

1. Bakgelogi ba re: Modimo o rata go phološa batho bao ba tla go dumela le bao ba tlo go tiišetša tumelong le boikokobetšong bja tumelo. Ba re wo ke morero wo o feletšego wa kgetho ya go iša phološong, le gore ga go selo se sengwe se utullotšwego Lentšung la Modimo ka morero wo.

Sinote sona se re: Bakgelogi ba timetša badumedi ka thuto ye ka go ganetša Mangwalo a Makgethwa. Mangwalo a hlatsa gore Modimo ga a rate go phološa bao fela ba tla go dumela, eupša le gore o kgethile batho ba bangwe go tšwa go se neng mathomo. Nakong ya go phela ga bona, Modimo o ba file tumelo go Kriste le tiišetšo, karoganong le ba bangwe. Bjalo ka ge go ngwadilwe gwa thwe: *Ke tsebaditše leina la gago go batho ba lefase, bao o nneilego bona* (Joh. 17:6); le gore: *gwa dumela bohole ba ba hlaioletšwego bophelo bjo bo sa felego* (Dit. 13:48). *A re kgethilego mo go Kriste mola lefase le sešo la thewa, gore re be bakgethwa, bj. bj.* (Baef. 1:4).

2. Bakgelogi ba re: Kgetho ya Modimo ge batho ba kgethelwa bophelo bjo bo sa felego e mehutahuta: E nngwe e akaretša e bile ga e tobe. E nngwe ke e hlomamégo le go toba. Ya mafelelo e aroganywa ka diripa tše pedi: Ke kgetho yeo e sego ya phethagala, yeo e ka go fediswa, yeo e sa tlamego mme e thekgilwe godimo ga mabaka; gape ke kgetho ye e phethagetšego, yeo e ka se fediswego, yeo e tlemago le yeo e sego ya thekgwa godimo ga mabaka.

Bakgelogi ba tšwela pele ba re: Go gona kgetho ya go iša tumelong, e nngwe ke kgetho ya go iša phološong. Ke gore go ka ba gona kgetho ya go kgethelwa tumelo ye e lokafatšang ka ntle ga gore go be le kgetho yeo e tlemago go iša phološong.

Sinote sona se re: Polelo ye ya bakgelogi ke monagano wa mothofela, owe o naganwago ka ntle le Mangwalo. Monagano wo o senyathtuto ya kgetho, bile o roba tlhophego ya bohlokwa ya phološo ya renab:
Ba a bego a ba hlaotše, ke bona a ba biditšego. Ba a ba biditšego, o ba lokafadiše. Ba a ba lokafaditšego o ba file letago (Barom. 8:30).

3. Bakgelogi ba re: Thato le maikešetšo a Modimo a bolelwago ke Mangwalo mabapi le thuto ya kgetho, ga a šupe gore Modimo o kgethile batho ba itšego go ba bangwe. Ba re a šupa gore gare ga mabaka ka moka a ka go ba gona (bjalo ka mediro ye nyakwago ke molao) Modimo o beile tumelo gore e be lebaka la go phološa. O dirile bjalo le ge tumelo ye, ka boyona e šitwa go ruiša motho se sengwe. Boikokobetšo bja tumelo le bjona ga bja phethega. Ka kgaugelo Modimo o tšea tumelo ye bjalo ka boikokobetšo bjo bo phethagetšego le gore e swanelwa ke go putswa ka bophelo bjo bo sa felego.

Sinote sona se re: Bokgelogi bjo bo senyang bo fokodiša thato ya Modimo le modiro wa Kriste. Go feta mowe ka dipotšišo tše di se nago thušo, batho ba tlošwa therešong ya tokafatšo ka kgaugelo, le ya bonolo bja Mangwalo. Ka seo ba re polelo ya moapostola ga e na nnete, ge e re:
Modimo yo a re phološitšego a re bitša ka pišo e kgethwa, e sego ka baka le mediro ya ren, eupša e le ka baka la morero wa gagwe le ka kgaugelo ye re e filwego go Kriste Jesu molao go sešo gwa ba le mabaka (2 Tim. 1:9).

4. Bakgelogi ba re: Ditšupo tše nyakwago kgethong ya tumelo ke tše latelago: Motho eo a šomišago lesedi la tlhago gabotse, eo e lego morapedi, eo e lego e monnyane, eo a ikokobetšago le eo a loketšego bophelo bjo bo sa felego; se nkego kgetho e thekgilwe ka tsela e nngwe godimo ga dilo tše.

Sinote sona se re: Kgopolole ya bakgelogi e swana le thuto ya Pelagiose, mme e lwantšana le thuto ya moapostola ge a ngwala a re:
mo go bona le ren, ka moka peleng re be re phela ka dikganyoga tša ren, ra dira tše di ratwago ke mmele le dikgopolole, me ka tlhago re be re le ba ba lego ka tlase ga bogale bja Modimo bjalo ka ba bangwe. Gomme Modimo, yo a lego mohumi wa dikgaugelo, o re ratile ka baka la lerato le legolo la gagwe, me o re phedišitše gammogo le Kriste, renab a re bego re

le ba ba hwilego dikarogong – ka kgaugelo le ba ba phološwego! – me o re tsošitše le yena, me o re dudišitše le yena magodimong mo go Kriste Jesu, gore a tle a laetše mehleng ye e tlogo tla lehumo le legolo ka go fetiša la kgaugelo ya gagwe ka botho go renal go go Kriste Jesu. Gobane ka kgaugelo le phološitšwe ka tumelo, me seo ga se tšwe go lena, ke mpho ya Modimo, e sego se se tšwago medirong, gore e se be yo mongwe a ka itumiša. (Baef. 2:3-9).

5. Bakgelogi ba re: Kgetho e sa phethegalang, le e sa tlameng ya batho ba bangwe go iša phološong, e diragetše ka tumelo le tshokologo le bokgethwa le borapedi, tše di ilego tša bonwa pele go bona. Ga go tshwenye gore na dilo tše di boletšwego ke tše di sa tšo go thongwa goba ke tše di bilego gona nako e itšego. Ga e le kgetho e phethagetšego le e tlamago, e diragetše ka gobane go ile gwa bonwa pele gore ba kgethilwego ba tla tuišetša tumelong le tshokologong le kgethegong le borapeding go iša mafelelong. Tše di nea motho bothakga bjo hwetšwago ka kgaugelo le bjo bo dumelanang le ebangedi, mme bo dira gore bothakga bja yo a kgethilwego bo fete bja yo a sa kgethwago. Tumelo le boikokobetšo bja tumelo le kgethego le borapedi le tuišetšo ga se dikenya tša kgetho e sa fetogego go iša letagong; eupša ke mabaka a be go a nyakega e sa le pele le mabaka a išago kgethong. Go bao ba tla go kgethwa, go šetše go nyakega e bile go lebeletšwe tše nkego ba šetše ba di phethile.

Sinote sona se re: Dipolelo tše tša bakgelogi di lwantšana le Lentšu lohole la Modimo le kwalagatšago gantši ditsebeng le dipelong tša renal, mantšu a latelago: – *gore morero wa Modimo wo o yago ka go itlhaoleta o tie, e sego ka mediro, eupša e be ka yo a bitšago* (Barom. 9:11). *Gwa dumela bohole ba ba hlaletšwego bophelo bjo bo sa felego* (Dit. 13:48). *Ka mo a re kgethilego mo go yena...gore re be bakgethwa* (Baef. 1:4) *Ga se lena le nkgethilego, eupša nna ke kgethile lena* (Joh. 15:16) *Ke gona mo lerato le lego gona: ga se gore renal re ratile Modimo, eupša ke gore yena o ratile renal, gomme o romile Morwa wa gagwe...* (Joh. 4:10).

6. Bakgelogi ba re: Ga se kgetho e nngwe le e nngwe ya go iša phološong yeo e sa fetogego. Bakgethwa ba bangwe ba ka timela, mme ba timelela sa ruri go ya go sa felego, le ge Modimo a be a rerile go ba kgetha.

Sinote sona se re: Ka bokgelogi bjo bjo bobo, Modimo o dirwa Modimo yo a fetogago, mme ba bolaya khomotšo yeo badumedi ba e

hwetšago go tieng ka kgetho ya bona, go feta mo ba ganetša Mangwalo a Makgethwa ao a rutago gore bakgethwa ba ka se ke ba fapošwa (Mat. 24:24), gore Kriste a ka se lahle ka moka bao Tate o mo neilego bona (Joh. 6:39), Mme ba a ba laoletšego pele, o ba biditše; mme ba a ba biditšeego, o ba lokafaditše; mme ba a ba lokafaditšeego, o ba tagafaditše (Barom. 8:30).

7. Bakgelogi ba re: Kgetho ye e sa fetogego, go iša letagong, ga e hlagiše dienywa bophelong bjo, e bile motho ga a be le boikutlo le bonnate bja yona. Fela tše motho a ka ba natšo di ithekgile mabakeng a fetogago le go se be le bonnate.

Sinote sona se re: Ke taba e sa kwišišagalego gore go bolelwe ka bonnate bjo bo se nego nnete. Go feta mowe polelo ya bakgelogi e lwantšana le boitemogelo bja bakgethwa. Boitemogelong bja kgetho ya bona, bakgethwa ba thaba mmogo le baapostola, mme ba tumiša mediro ya Modimo (Baef. 1). Boikokobetšong go Kriste, ba thaba mmogo le barutiwa gobane maina a bona a ngwadilwe magodimong (Luk. 10:20). E bile ba šomiša boitemogelo bja kgetho ya bona, go tima mesebe ye e tukago ya go tsogelwa ke Diabolo, ge ba ntše ba re: *Ke mang yo a tlago bea bakgethwa ba Modimo molato?* (Barom. 8:33).

8. Bakgelogi ba re: Ga go motho yo a tlogelwago go weng ga Adama le boemong bjo bo akaretšago bja sebe le timelong, fela ka gobane Modimo a rerile, ka thato ya gagwe ye e lokilego, go mo lesetša moo. Gape ba re ga go motho yo a fetwago ke Modimo kabong ya kgaugelo, eo e nyakegago tumelong le tshokologong.

Sinote sona se re: Ke nnete gore: Modimo o gaugela yo a ratago go mo gaugela, mme o thatafatša yo a ratago go mo thatafatša (Barom. 9:18). Go feta moo: *Lena le filwe go tseba diphihlo tša mmušo wa magodimo, fela bona ga ba ka ba fiwa* (Mat. 13:11). Gape: *Ke a go leboga wena Tate, Morena wa legodimo le lefase, ge tše o di fihleše ba bohlale le ba thaeloganyo, mme wa di utollela masea. E! Tate, gobane ke mo go go kgahlilego* (Mat. 11:25-26).

9. Bakgelogi ba re: Lebaka le le dirago gore Modimo a romele setšhaba se itšego ebangedi, mola se sengwe se fetwa, ga se fela thato ya Modimo, eupša ke ka baka la gore setšhaba se sengwe se le kaone le mohola go se sengwe seo ebangedi e sa bolelwego go sona.

Sinote sona se re: Kgopolole ye e latolwa ke Moše ge a re go setšhaba sa Israele: *O ke o bone; magodimo le magodimo a magodimo ke a*

Morena Modimo wa gago, le lefase le tšohle tše di lego mo go lona. Fela, ba a ratilego go ba rata ke botataweno, a itlhaoela bana ba bona ba mehleng ya ge ba ile, bo-lena; a le hlaola mo go ditšhaba tšohle. Ke tšona tša mehla yeno (Doit. 10:14-15). Le Kriste o itše: Joo, wena Korasima! Joo, wena Betsaida! Ditiro tše maatla tše di dirilwego mo go lena, ge e ka be di dirilwe Tiruse le Sidone, ba ka be ba sokologile kgale, ba apere mankgeretla, ba dutše meloreng (Mat. 11:21).

THUTO YA BOBEDI

LEHU LA KRISTE LE PHOLOŠO YA BATHO KA LEHU LA GAGWE

1. Modimo ga se fela wa kwelobohloko ka go fetišiša, eupša o ne toko e kgolo. Ka toko ya gagwe, ge a e utolla Lentšung la gagwe — Modimo o laela gore dibe tša rena, tše di dirilwego kgahlanong le borena bja gagwe bjo bo sa felego, di ôtlwe. Di se ke tša ôtlwa lebakanyana feela, eupša e be dikotlo tše di sa felego tša moyo le mmele. Dikotlo tše, re ka se di phonyokge ge e se ge go ka phethwa toko ya Modimo.

2. Ka borena ga re kgone go phetha le go ikhunolla kgalefong ya Modimo. Modimo ka kgauvelo ya gagwe ye e sa felego, o re file Morwa wa gagwe motswalwanoši gore e be moemedi wa rena, a lefele melato ya rena. A re eme legato, a ipeleše thogako sefapanong bakeng sa rena.

3. Lehu le, la Morwa wa Modimo, ke lona sehlabelo se nnoši, se se phethegilego se se ka kgotsofatšago Modimo bakeng sa dibe. Le na le maatla a sa felego le boholokwa bjo bo sa felego. Le lekane go boelanya lefase ka moka le Modimo.

4. Gomme ka fao lehu le, le na le maatla a magolo le mohola, ka ge motho yo a tsenego polaong ya lona e se motho fela ya feletšego yo mokgethwa, eupša e bile ke Morwa wa Modimo yo a tswetšwego a nnoši go iša go sa felego e lego boyena bo tee bjo bo sa felego le Tate le Moya o Mokgethwa ka mo Mophološi wa rena a swanetšego go ba ka gona. Godimo ga fao lehu la gagwe le na le maatla le mohola ka gobane le na le kamano kgalefong ya Modimo le thogako ye e tlilego ke baka la dibe tša rena.

5. Go iša pele ke kholofedišo ya ebangedi *gore e mongwe le e mongwe yo a dumelago go yena a se ke a lahlega, eupša a be le bophelo bjo bo sa felego.* (Joh. 3:16).

Gomme kholofedišo ye e swanetše go goeletšwa le go tsebišwa bathong ka moka bao Modimo a ba romelago ebangedi ya gagwe, ka mo go mo thabišago; e goeletšwe ka ntle ga kgethollo, ka taelo ya tshokologo le tumelo.

6. Ba bantši bao ba biditšwego ka ebangedi ga ba sokologele goba go dumela go kriste, eupša ba hwela bohlokatumelong. Seo ga se tlišwe ke bohloki goba go-se-lekane ga sehiabelo seo Kriste, a se tlišitšego sefapanong, eupša se phethagatšwa ka baka la molato wa bona.

7. Bohle bao ba dumelago ka kgonthé, ba lokolotšwe tshenyegong, ba phološwa dibeng ka lehu la Kriste. Ba ipshina medirong ye, e lego kgaugelo ya Modimo fela; kgaugelo yeo ba e filwego ka Kriste go tloga mathomong go fihla bofelong, go se lebaka leo le tlamago Modimo gore a e abele motho.

8. E bile morero wa bolokologi ka botlalo wa Modimo Tate ka thato ya kgaugelo, le maikemišetšo a gagwe gore maatla a a phedišago, a phološo, a lehu le bohlokwa la Morwa wa gagwe e be mohola woo o akaretšago bakgethwa ka moka. Ka lebaka leo Modimo o file bakgethwa ka moka fela tumelo yeo e lokafatšago gore ka yona ba tie ba phološwe ka go phethega. Ke gore: E be e le thato ya Modimo, gore ba tie ba phološwe ka maatla a madi a Kriste sefapanong ba nnoši, ao a tiišitšego kgwerano e mpsha ka ona. Ke bao ba tšwago setšhabeng se sengwe le se sengwe le bathong ba bangwe le ba bangwe le molokong o mongwe le o mongwe le lelemeng le lengwe le le lengwe. Bona bao ke bao ba kgethetšwego phološo go tloga go se neng mathomo, mme ba fiwa yena ke Tate.

Go feta moo e bile thato ya Tate gore Kriste a ba fe tumelo, yeo a ba thopetšego yona ka lehu la gagwe, bjalo ka dimpho tše dingwe tša Moyo o Mokgethwa tše di hlogenolofatšago.

Go feta fao o tla ba hlatswa ka madi a gagwe dibeng tša bona ka moka e lego dibé tša tlhago le tša mediro tše di dirilwego pele le ka morago ga ge ba dumetše. Sa mafelelo ke gore o tla ba boloka ka potego go iša mafelelong mme a ba tšweletša ka letago pele ga gagwe ba hloka sekodi goba senyaloo.

9. Morero wo o bile gona ka baka la lerato le le sa felego la Modimo go ba ba kgethilwego. Morero wo o tšweletše pele go tloga mathomong a lefase go fihla lehono, kgahianong le madira a Sathane ao

a sa holego selo. Morero wo o tlo tswela pele gore bao ba ba kgethilwego ba tie ba be mmele o tee ka nako yeo e lebanego. Go tlo dula go na le kereke ya bao ba dumelago, bao ba theilwego mading a Kriste. Kereke ye e tla mo rata ka botlalo e le Mophološi, yeo a filego kereke bophelo bja gagwe sefapanong, bjalo ka monyadiwa yo a filego monyadi bophelo bjo gagwe, a mo direlago ka kgotlelelo, go tloga bjale go fihla ka go sa felego.

TATOLO YA DITHUTO TŠE DI KGELOGILEGO

Bjalo ka ge dithuto tše di lokilego di hlopilwe gabotse, Sinote se latola dithuto tše di kgelogilego.

1. Bakgelogi ba re: Modimo Tate o rometše Morwa wa gagwe gore a tlo hwa lehu la sefapano kantle ga morero wo o itšego wa gore go tlo phološwa yo mongwe. Bohlokwa le mohola le tumišego tša tefelo ya lehu la Kriste di ka ba gona, tša phethagala ka gohle, tša hlweka, tša dula di le taba e tee, le ge go ka se be motho ka o tee, yo a amogelago phološo yeo Kriste a e šometšego.

Sinote se ruta se re: Thuto ye e nyenyefatša bohlale bja Modimo Tate le tefelo ya Jesu Kriste gomme e Iwantšana le Mangwalo a Makgethwa.

Mophološi wa rena o re: *ke beela dinku bophelo bja ka...gomme ke a di tseba* (Joh. 10:15, 17). Moprefeta Jesaya yena o bolela ka ga Mophološi o re: *Ge a beile moyo wa gagwe ya ba selefa, o tlo bona bana le go phela ga lelele; mme morero wa Morena o tlo letlega ka diatla tša gagwe.* (Jes. 53:10). Go feta fao e ganetša temana ya boipolelo bja tumelo ye e rego: Ke dumela Kereke e kgethwa ya bohle.

2. Bakgelogi ba re: E be e se maikemišetšo a lehu la Morena Jesu go tiiša kgwerano e mpsha ya kgaugelo ka madi a gagwe. Maikemišetšo e be e le fela gore a hweletše Tatagwe toka ya gore o dira kgwerano e mpsha ya kgaugelo le motho goba ya měšomo, ka mokgwa wo a ratago ka gona le ka mo a ka tlemago ka gona.

Sinote sona se re: Thuto ye e Iwantšana le Mangwalo ao a rutago gore Kriste e bile *Mmoemedi le Mmoelanyi wa kgwerano e mphsa ye e phalago ya pele gobane kwano ya bohwa e na le maatla ge go hwilwe* (Baheb. 7:22; 9:15,17).

3. Bakgelogi ba re: Ka tefelo ya gagwe Kriste ga a ká a hweletša motho phološo e le ka nnete, le ga e le tumelo yeo ka yona motho a ka amogelago tefelo e maatla ya Kriste le phološo; eupša o hweleditše Tate maatla le thato ye e tletšego fela, gore a kgone go šomišana le batho ka bofsa le go beakanya mabaka ka mo a ratago. Go phethagatšwa ga tšeо go tlo tšwa go ithateleng ga motho mme go a kgonega gore go se be le motho yo a kago di phetha goba batho bohole ba ka di phetha.

Sinote sona se re: Batho ba ba nyatša lehu la Kriste ka go tlala; ga ba amogele kenywa ya bohlokwa yeo e hwetšwago ka lona. Ba tsoša gape bokgelogi bja Pelagiose.

4. Bakgelogi ba re: Modimo Tate o tšweleeditše kgwerano e mpsha ya kgaugelo le batho ka lehu la Kriste. Kgwerano yé ga e bolele gore re lokafatšwa le go phološa pele ga Modimo ka tumelo ye e amogelago tefelo ya Kriste. Ba re kgwerano e mpsha e bolela gore Modimo ge a fedišitše seo molao o bego o se nyaka ka botlalo gore se phethwe, o tsere tumelo le go phela ka tumelo e le phetho ye e tletšego ya molao, mme ka kgaugelo o amogela tumelo gore e lekane go putswa ka bophelo bjo bo sa felego.

Sinote sona se re: Batho ba, ba ganetša Lengwalo le le rego: *Ba lokafatšwa ka go fiwa ka kgaugelo ya gagwe ka topollo ye e lego mo go Jesu Kriste. Yena yo Modimo o mmeile, gore ka madi a gagwe a be seboelanyi ka tumelo* (Barom. 3:24,25).

Ba dumelana le Socinus yo a ilago Modimo, ka go tsentšha thuto e mpsha e šele ya tokafalo ya motho pele ga Modimo. Taba ye e kgahlanong le boipolelo bjo bo kopanetšwego bja kereke ka moka.

5. Bakgelogi ba re: Batho ka moka ba boelantšwe le Modimo me ba amogetšwe kgweranong ya kgaugelo, gore go se be le o tee yo a ka yago tahlegong ka baka la sebe sa tlhago. Eupša batho ka moka ba lokologile molatong wa sebe se.

Sinote sona se re: Kgopoloye e Iwantšhana le Lengwalo le le rego: ...*Ka tlhago re be re le ba ba lego ka tlase ga bogale bja Modimo bjalo ka ba bangwe.* (Baef. 2:3)

6. Bakgelogi ba dira phapano magareng a go boelwa le go itšeela phološo. Ba somiša phapano ye ka mo go sa lokang, ka go hlohleletša menagano ya bao ba sa hlokomelego le ba-hlokatsebo; ba hlohleletša bao gore Modimo go ya ka boyena o rata go arolela batho ka moka mediro e mebotse yeo e hweditšwego ka

lehu la Kriste ka go lekana. Gape ba re: ba bangwe ba hwetša tshwarelo ya dibe le bophelo bjo bo sa felego eupša ba bangwe ga ba di hwetše, ke ka baka la thato ya bona ya bolokologi yeo e itekanetšego kgaugelong ye e fiwago kantle le phapang. E sego ka baka la mpho e bohlokwa ya kwelobohloko ye e šomago ka maatla ka go bona, ya gore bona ba ka itšeela kgaugelo go feta ba bangwe.

Sinote sona se re: Batho ba ba sema eka ba tšweletša pharologanyo ye ka moyo o lokilego, ba leka go leša setšhaba mpholo wo o senyago wa bokgelogi bja thuto ya Pelagiose.

7. Bakgelogi ba re: Kriste o šitilwe go hwela bao ba ratwago ke Modimo ka kudu e bile a ba kgethetše bophelo bjo bo sa felego. Gape ga se a ba hwela ka gobane ba be ba sa hloke lehu la gagwe.

Sinote sona se re: Ba ganetše moapostola yo a rego: *Morwa wa Modimo o nthatile, e bile o ikgafile ka baka la ka* (Bagal. 2:20) Gape o re: *Ke mang yo a tšwago? Kriste ke yena a hwilego* (Barom. 8:33, 34), a hwela bona. Gape ba ganetša Mmoloki yo a rego: *Ke gafa bophelo bja ka ka baka la dinku.* (Joh. 10:15). *Molao wa ka šo: Ratanang bjalo ka ge ke le ratile. Ga go e a nago le lerato le le fetišago la yo a gafago bophelo bja gagwe ka baka la bagwera ba gagwe.* (Joh. 15:12, 13).

THUTO YA BORARO LE YA BONE

TSHENYEGO YA MOTHO LE TSHOKOLOGELO GO MODIMO.

1. Motho o bopilwe ka seswantšho sa Modimo go tloga mathomong. Thaologanyong a thakgafatšwa ka tsebo ya nnete ya mahlogenolo, ya Mmopi, le ka ditaba tše dingwe tša semoya. Thatong le pelong ya gagwe o be a hlamilwe ka toko, mme maikutlo a gagwe a hlwekile. Ka fao e be e le yo mokgethwa ka gohle. E rile ge a furalela Modimo ka baka la diabolo le ba baka la boyena a ikamoga dimpho tše bohlokwa tše. Sebakeng sa tšona a ikapeša bofofu, lefsifsi le le ſiišago le kahlolo e ſele kgopolong ya gagwe, pefelo bonganga, boitati thatong ya gagwe le pelong, gape le go se hlweke maikutlong a gagwe ka moka.

2. Ka mokgwa wo motho a bilego ka gona ka morago ga go wa, le bana bao a ba belegilego ba bile bjalo. E le mosenyegi o belega bana ka tshenyego. Go ya ka kahlolo ye e lokilego ya Modimo, tshenyegoye e thomilego go Adama ya fetela ditlogolong tša gagwe ka moka, ge e se

Kriste fela. Tshenyego ye ya motho ga e tle ka go latela ba bangwe bjalo ka ge Pelagiōse a boletše; eupša e tla ka go tšwelela ga tlhago ye e senyegilego.

3. Ka baka leo batho ka moka ba amogetše sebeng, gomme ba belegwe e le bana ba kgalefo, bao ba sa kgonego go dira tše botse tše di phološago le gatee. Ba sekametše bobeng, ba hwile ka baka la sebe, e bile makgoba a sebe. Ba ka se ke ba boela go Modimo, e bile ga ba rate; ga ba rate go lokiša tlhago ya tshenyego ya bona, goba go thoma go e lokiša, kantle ga kgaugelo ya Moya o Mokgethwa yeo a tlišago tswalo ya bobedi.

4. Ka morago ga go wa ga motho go šetše mahlasedi a manyane a tlhago. Ka ona motho ga a na le tsebonyana ya Modimo, ya dilo tša tlhago, ya go ka aroganya makgatheng a tše botse le tše mpe, mme o leka ka gonyane go bontšha bothakga le toko phatlalatša. Gape ga go kgonege gore motho a boele go Modimo le go sokologa ka lesetšana leo la tlhago. Le ditabeng tša tlhago le tša boagi ga a kgone go šomiša seetšana seo ka mo go swanelago. Le ge go le bjalo, o di fifatša ka bottalo ka mekgwa ye e fapanego, mme a di khupetša ka go se loke. Ka go dira bjalo, ga a ne maitswarelelo pele ga Modimo.

5. Bjalo ka lesedi la tlhago, go bjalo mo melaong e lesome, yeo Modimo a e filego Bajuta ka Moše. Molao o utolla bogolo bja sebe e bile o bontšha motho ka ga molato wa gagwe. Eupša ga o fodiše e bile go o fe maatla a gore motho a tšwe bomadimabeng bjoo. Molao o dira gore motho a dule ka fase ga thogako, ka gobane nama e o dirile gore o hloke maatla. Ka lebaka leo motho a ka se ke a hwetša mahlogenolo a kgaugelo ka molao.

6. Seo se sa kgonegego go phethwa ka lesetšana la tlhago goba ka molao Modimo o se phetha ka maatla a Moya o Mokgethwa le ka Lentšu goba ka tirelo ya poelano. Ka yona ebangedi ya Mesia yeo ka yona go kgahlilwego Modimo go phološa badumedi ba Testamente e Tala le ba Testamente e Mpsha.

7. Meh leng ya Testamente e Tala Modimo o tsebagaditše sephiri se sa thato ya gagwe go bao e sego ba bakae. Ge e le mehleng ya Testamente e Mpsha, moo kgethollo magareng ga ditšhaba e fedisitšweng, sephiri se Modimo o se tsebagaditše go batho ka moka. Go fapana ga maemo magareng ga ditšhaba ga go tlišwe ka gore setšhaba se sengwe se okametše se sengwe ka bohlokwa, goba ka gobane se sengwe se ile sa šomiša hlase ya lehlasedi la tlhago go feta se sengwe. Eupša ke ka

kgahlego ye e tletšego ya lerato la Modimo. Ke lebaka leo bao ba fiwago kgaugelo e kgolo yeo gakaalo ba sa ka ba e šomela, e ka kgona ba e amogele ka dipelo tše di ikokobeditšego, tše di lebogago. Bao ba sa hwetšego kabelo kgaugelong yeo ba hlomphe bogale bja kahlolo ya Modimo le toko ya gagwe. Ba hlomphe tše gotee le moapostola ka ntle ga go nyakišiša.

8. Batho ka moka bā ba biditšwego ka ebangedi ye, ba bitšwa ka nnete. Ka gobane ka therešo ka Moka le ka nnete Modimo o hlatsela ka Lentšu la gagwe tše di mo kgahlago, gore bohole ba ba biditšwego ba tle go yena. O tshepiša kudu gore bohole ba ba tlago go yena ba dumele, o tlo ba nea khutšo moyeng le bophelo bjo bo sa felego.

9. Batho ba bantsi bao ba biditšwego ka tirelo ya ebangedi ga ba tle go yena, me e bile ga ba sokologe. Mo molato ga se wa ebangedi goba wa Morena Jesu, yoo a tlišwago ke ebangedi, goba wa Modimo yoo a bitšago batho ka ebangedi, e bile a ba fago le dimpho tša go fapania. Molato o go bao ba biditšwego ka bobona; ba bangwe ga ba amogele Lentšu la bophelo ka go se hlokomele ga bona; ba bangwe ba le amogela, eupša e sego ka botebo bja dipelo tša bona, ka baka leo ba wa ka morago ga lethabonyana la tumelo ya sebakanyana. Ba bangwe gape ba dumelela Lentšu go khupetšwa ke meetlwa ya matshwenyego le mathabo a lefase gomme ga ba bee dikenywa bjalo ka ge Mophološi wa rena a re ruta seswantšhong sa mobjadi (Mat. 13).

10. Batho ba bangwe gape, bao ba biditšwego ke phatlatalšo ya ebangedi, ba a tla gomme ba sokologa, go se ke gwa thwe seo se tšwa go motho boikgethelong bja gagwe bja bolokologi; bjalo ka ge e ke o nyaka go itilhaola go ba bangwe ba ba amogetšego kgaugelo ye e lekanego ye e išago tumelong le tshokologong. Ka mokgwa o bjalo go bolela bokgelogi bja Pelagiose. Tumelo le tshokologo di tšwa go Modimo. O ba kgethile ka Kriste go ba ba gagwe go tloga go se nago mathomo. Gape o ba bitša ka maatla bophelong bja bona gore a ba fe tumelo le tshokologo.

Ge ba šetše ba tiemolotšwe maatleng a lefsifsi, o ba tliša ka mmušong wa Morwa wa gagwe, gore ba phatlatalše go loka ga yoo a ba biditšego lefsifsi a ba tliša seetšeng sa gagwe sa matete. E sego gore ba ikgodiše eupša ba godiše Modimo, bjalo ka ge mangwalo a baapostola a hlatsela.

11. Go feta moo, ge Modimo a phethagatša toko ya gagwe go bao ba kgethilewego, gomme a hlagiša tshokologo ya nnate, ga a re gore ebangedi e bolelwe go bona fela, eupša o ba thuša ka Moya o Mokgethwa gore ba kwišiše. Ka mokgwa woo, ba a kwišiše le go

hlaologanya ditaba tša Moya wa Modimo; eupša ka maatla a go šoma ga Moya, wo o tlišago tswalo ya bobedi, o tsena botebong go fihlela dithong tša ka gare ga motho; o bula pelo yeo e tswaletšwego; o letefatša pelo e thata; o bolotša yeo e sa bollago. Ka thatong ya motho o fa maikutlo a mafsa, o dira gore thato ye e bego e hwile, e phele; ye e bego e se ya loka, e loke; yeo e bego e sa rate, e rate; yeo e bego e sa kwe, e kwe. O a hlohleletša me a boela a tiša thato, gore e be bjalo ka mohlare wo mobotse, wo o enywago dienywa tše bose tša mediro ye e lokilego.

12. Ke tswalo ya bobedi, tlholo e mpsha, tsošo bahung, phedišo, yeo Modimo a e šomago ka go rena ka ntle ga thušo ya rena, yeo mangwalo a bolelago ka yona gabotse. Tšeо ka moka ga di tlišwe mo go rena ka theroy a bokantle fela, goba ka kgodišo, goba ka engwe tsela.

Ge Modimo a phethile mošomo wa gagwe ga go šale thatong ya motho gore a tswalwe la bobedi goba aowa, a sokologe goba aowa. Ke mošomo wo o makatšago, o ka godimo ga tlhago, ke o maatla ka kudu, wa bothakga, wa go fetiša, ke sephiri se se šitwago go hlathollwa.

Mangwalo a a filwego ke yena, mohlodi wa mošomo wo, a hlatsela bjalo: Maatla a mošomo wo ga se a manyenyane go maatla ao dilo di hlodilwego ka ona, goba ao bahu ba tsošwago ka ona. Ka baka leo bohole bao Modimo a šomago ka mokgwa woo dipelong tša bona, ba tswalwa la bobedi gomme ba dumele ka nnete ka mo ba ka se kego ba fetolwa, mme ba tla dumela ruri. Thato ya motho yeo e mpshafaditšwego ka mokgwa wo, ka ge e šušumetšwa ke Modimo, le yona e thoma go šoma ka boyona. Ka baka leo go bolelwa gore ka kgaukelo yeo motho a e hweditšego o a dumela a sokologa.

13. Semelo sa tiro ye, badurnedi ga ba kgone go se kwišiša ka botlalo bophelong bjo. Ba kgotsotšwa ke tsebo le maikutlo mme ba na le bohlatse bja go re ka kgaukelo ya Modimo ba dumela ka pelo le gore ba rata Mophološi wa bona.

14. Ka mokgwa wo tumelo ke mpho ya Modimo. E sego ka gobane Modimo a e fa batho ka go ithatela ga motho, eupša e le ka go hlathollelw, go fiwa, le ka go tšollelw. Gape e sego gore Modimo o tlo fa fela maatla a go dumela, ka morago a lebelela go motho tumelelo goba tumelo ya nnete ya tokologo ya motho, eupša o diriša motho go rata le go dira thato ya gagwe. Modimo o šoma tšohle go bohole, le go tliša thato ya go dumela le tumelo ka boyona.

15. Modimo ga a ne molato go motho ka kgaukelo ye. Na Modimo a ka ba le molato ofe go motho ge e le gore motho a ka se mo fe selo se a

swanetšego go se bušetša? Modimo a ka ba le molato wa eng go yoo a se nago le selo ge e se sebe le maaka feela? Yo a hwetšago kgaugelo ye, o swanetše go leboga Modimo fela ka mehla, ka baka la kgaugelo yeo. Yo a sa amogelego kgaugelo ye ga a tshwenyege ka tša semoya, mme o ithabiša ka tša gagwe.

Ka go se nagane, o ikgodiša ka lefela ka tše a gopolago gore o našo mola a se na selo. Gape, bao ba ipolelago tumelo ya bona phatlatalša, e bile ba kaonafatša maphelo a bona, go ya ka mohlala wa baapostola ba swanetše go hlahllobja ka kgaugelo, ba bolelwe ka tshwanelo; gobane bokagare bja pelo ga bo tsebje. Gomme bao ba sa bitšwago, re ba rapelele go Modimo e a hlotšego tše di sego gona, bjalo ka ge e ka di kile tša ba gona. Gomme re se ke ra ikgogomošetša bona ka kgopolo ya go re re a ba phala.

16. Go weng ga gagwe, ka baka la sebe, motho ga se a kgaotša go ba motho, le go ba le tlhaologanyo le thato. Mme sebe se se tseneletšego meloko ka moka ya batho, ga se sa tloša tlhago ya motho, eupša se e sentše mme go ya ka tša semoya sa ba sa e bolaya. Ka lebaka leo kgaugelo ya Modimo ya go tswalwa la bobedi ga e šome ka go motho bjalo ka ge eka motho ke phata goba kwata. Ga e senye thato le semelo sa motho, gape ga e di gapeletše ka maatla kgopolong ya gagwe. Fela kgaugelo ye e phediša thato ka semoya, e a e fodiša, e a e kaonafatša, e a e koba gabotse ka maatla. Nama yeo e bego e iphile maatla a go buša pele, bjale e thoma go theetša Moya o Mokgethwa ka mafolofolo le ka nnete. Yeo ke yona mpshafalo ya nnete ya semoya le tokologo ya thato ya motho. Ge nkabe Modiro wa matete ohle a se a dire bjalo le rena, nkabe re se na tshepo ya go tsoga go weng ga rena ka thato ya gagwe ya bolokologi. Ka gobane o itahletše tahlegong ka thato ya gagwe mola a sa na le Modimo.

17. Modiro wa maatla ka moka wa Modimo, wo a tswalago bophelo bja rena bja tlhago e bilego a bo hlokamelago, ga o lahle dišomišwa tše, Modimo a di šomišago ka mehla le ka bohlale le ka go loka go phethagataša maatla a gagwe, eupša o rata gore di šomišwe.

Ka mokgwa wo bjalo tiro ya mohlolo ya Modimo ye e šetšego e boletšwe, yeo ka yona re tswalwago la bobedi, ga e fedishe tiro ya ebangedi yeo Modimo yo bohlale a e beilego bjalo ka peu ya tswalo ya bobedi le sejo sa moyo wa motho. Baapostola le baruti ba ba latetšego ba ile ba ruta batho kgaugelo ye ya modimo ka botshepegi, se ba se dirile kgodišong ya Modimo le ka sephego sa go fedishe boikgogomošo bja motho ka moka. Ge baapsotola ba dutše ba dira bjalo, ga ba ka ba lesa

go boloka batho ka tlase ga kobo ya Lentšu le disakramente le tayo ya kereke ka dikgalemelo tše kgethwa tše di tšwago ebangeding, ka tsela ye bjalo, le gona bjale ba rutago le ba ba rutwago phuthegong, ba se ke ba leka Modimo ka go ikgogomoša, ka go realo ba aroganya tše Modimo, boithatelong bja kgahlego ya gagwe a ratilego gore di dule di kopane. Gobane kgaugele e abja ka go diriša dikgalemelo.

Ge re phetha mošomo wa rena ka mafolofolo, kgahlego ye e di-rwago ke Modimo mo go rena, e bonagala kudu, mme mošomo wo o tšwela pele ka mokgwa o mobotse. Go Modimo yo, e be letago le le sa felego ka baka la dišomišwa, ka baka la dikenya tša tšona tše di išago phološong, le ka maatla a tšona! Amene.

TATOLO YA DITHUTO TŠA BOKGELOGI

Ka ge thuto ya therešo e hlahlošwa go ya ka Lentšu la Modimo, Sinote se latola bokgelogi bja batho ba ba rutago tše di latelago:

1. Bakgelogi ba re: Motho a ka se ke a re sebe sa tlhago se ka kgona go tliša kahlolo goba kotlo ye e sa felego go ya ka moloko le moloko.

Sinote sona se re: Ka go realo ba ganetša moapostola yo a rego: *Bjalo ka ge sebe se tsene lefaseng ka motho o tee, me lehu le tsene ka sebe, lona lehu le aparetše batho bohole, ka gobane ka moka ba dirile dibe* (Barom. 5:12). Gomme: "...kahlolo ye e tšwilego go o tee e iša tšuong" (Barom. 5:16). Gomme: "Moputso wa sebe ke lehu" (Barom. 6:23).

2. Bakgelogi ba re: Dimpho tša moyo goba maikemišetšo a mabotse bjalo ka botho, bokgethegi, go loka: thatong ya motho di ka se be gona go tloga tlholong ya gagwe; ka baka la go se be gona go tšona, di šitwa go arogangwa le thato ya gagwe go weng ga gagwe.

Sinoto sona se re: Polelo ye e Iwantšana le tlhalošo ya moapostola ya go re motho o *bopilwe ka seswantšho sa Modimo go lokeng le bokgethweng bja therešo* (Baef. 4:24). Ka ntla ga pelaelo bobedi bja tšona (toko le bokgethwa) di ituletše thatong ya motho.

3. Bakgelogi ba re: Lehung la moyo dimpho tša Moya ga di arogane le thato ya motho. Ke ka gobane thato ya motho ka boyona ga se nke e senyega, eupša e tshwentšwe ke lefsifsi la kgopolole go fetoga ga maikutlo a motho. Ge ditshwenyo tše di tlošwa, thato ya motho e tla boela go dira ka bolokologi bja maatla ao e hlagilego ka ona; ke gore ka boyona e ka ithatela le go ikgethela tše di botse tša mehuta-huta, goba ya gana go dira bjalo.

Sinote sona se re: Kgopolā ye ke ye mpsha le bokgelogi. E godiša maatla a thato ya motho ya bolokologi me e lwantshana le polelo ya moporofeta ge a re: *Pelo ke yona mmata-mano-mabe, ke yona lešaedi; e hlathwa ke mang?* (Jer. 17:9). ke polelo ya moapostola ge a re: *Ba go se kwe – mo go bona le renā ka moka peleng re be re phela ka dikganyogo tša renā, ra dira tše di ratwago ke mmele le dikgopolo* (Baef. 2:3).

4. Bakgelogi ba re: Motho yo a sa tswalwego la bobedi ga se a hwela ruri sebeng goba ga se a hlobolwa maatla ka moka go ya ka toko ya moyā; eupša o sa na le gona go ka kwa tlala le go nyorelwa toko le bophelo. O sa kgona go tliša sehlabelo sa moyā wo o robegilego, wo o gakanegilego, se se kgahlago Modimo.

Sinote se re: Dipolelo tše di lwantshana le bohlatse bjo bo tletšego bja Lentšu la Modimo le le rego: *Le lena ba le bego le hwile dikarogong le dibeng* (Baef. 2:1,5); le go re: *Tiro ka moka tša dikakanyo tša dipelo tša bona e le bobe fela ka mehla.* (Gen. 6:5; 8:21).

Go feta moo, ke ba ba bitšwago ba lehlogenolo ba ba kago swarwa ke tlala le go nyorelwa bophelo le go phološwa bomadimabeng, me ke bona fela ba ka tlišago sedimo sa moyā wo o robegilego go Modimo (Ps. 51:17; Mat. 5:6).

5. Bakgelogi ba re: Motho e a hlagago a senyegile a ka šomiša kgaugelo yeo e ka tlelago batho ka moka. Kgaugelo ye ke lesedi leo le hweišwago ke motho go hlageng ga gagwe. Gape a ka šomiša dimpho tše di ileng tša mo šalela go weng ga gagwe gabotse. Tšomiso ya tšona e botse e ka mo hweletša kgaugelo ye e fetago yeo, ke gore yeo e bolelelwago diebangeding goba yeo e phološago. Ka mokgwa woo a ka ikhweletša phološa ka boyena gabotse-botse ka mekgwa ye e latelago. Mokgwa wa go re Modimo o ikutulotše ka lehlakoreng la gagwe o rata go utulla Kriste go batho bohole, ka gobane o fa bohole ka mokgwa wo o lekanego maatla dilo ka moka tše ba di hlokago gore ba sokologe.

Sinote sona se re: Polelo ye e phošagetše gobane ga e dumelanelane le boitemogelo bja batho ka dinako ka moka. Me Lentšu la Modimo le hlatsela gore ga se nnete, le re: *Me Lentšu la gagwe o le anegetše ba-Jakobo; ba Isiraele o ba anegetše melao ya gagwe le mekgwa ya gagwe. Mo go ba ntle bohole ga a ešo a bá a di dira; me mekgwa ya gagwe bona ga ba e tsebe* (Ps. 147:19, 20) Me: *Mehleng ye e fetilego o lesitše ditšhaba ka moka tša sepela ka ditsela tša tšona* (Dit. 14:16). Gape Lentšu le re ka bo-Paulo: *Me ba putla naga ya Frigia le ya Galatia, gobane ba be ba*

thibetšwe ke Moya o Mokgethwa go bolela Lentšu Asia. Eitše ge ba fihla thoko ya Misia, ba leka go ya Bithinia, fela Moya wa Ješu ga wa ka wa ba dumelala (Dit. 16:6,7).

6. Bakgelogi ba re: Tshokologong ya nete ya motho ga go na dimelo tše mpsha goba maatla a mafsa goba dimpho tše Modimo a ka di tsentšhago thatong ya motho. Ka baka leo tumelo yeo, re sokologilego mathomong ka yona me ra bitšwa badumedi, ga se semelo se sefsa goba mpho yeo e ka tšelwago ke Modimo, eupša ke tiro ya motho. Tumelo e ka bitšwa fela gore ke mpho ka baka la maatla ao motho a bilego le ona go e hwetša.

Sinote sona se re: Ka mokgwa woo ba Iwantšha Mangwalo a Makgethwa a hlatsago gore Modimo o tsentšha semelo se sefsa dipelong tša rena, e lego sa tumelo le sa go theeletša le sa go kwa lerato la gagwe: *Ke tlo bea melao ya ka matswalong a bona, ke tlo e tloka dipelong tša bona* (Jer. 31:33) Mme: *Naga ye e nyorilwego ke e tšhela meetse, mo go omilego ka iša dinokana. Peu ya gago ke tlo e tšhela Moya wa ka* (Jes. 44:3) Gape: *Lerato la Modimo le tšholletšwe dipelong tša rena ka Moya o Mokgethwa wo re o filwego* (Barom. 5:5). Gape ke go Iwantšhana le ka mo go šongwago ka gona kerekeng ya Modimo ka mehla ge e rapela gammogo le moprofeta a re: *Ntshokolle, ke sokologe; gobane Morena Modimo wa ka ke wena* (Jer. 31:18).

7. Bakgelogi ba re: Kgaugelo ye re sokologelago go Modimo ka yona, ga se selo ge e se keletšo ye boleta. Ba bangwe ba hlaloša ka go re tshokologong ya motho, kgaugelo yeo e šomišwa ka mokgwa o mobotse-botse; mme e dumelana gabotse le tlhago ya motho, mme go šomišwa mo go diragala ka mokgwa wa Keletšo.

Ga go selo se se ka šitago kgaugelo ye e eletšang gore e se ke ya lekana go fetola motho wa tlhago go mo dira motho wa semoya. Modimo ga a Šušumetše thato ya motho gore e sokologe ge e se fela ka go eletšwa bjalo. Maatla a go šoma ga Modimo a feta maatla a go šoma ga Sathane; ka gobane Modimo o tshephiša motho tše di sa felego, eupša Sathane o mo tshepiša tše di felago.

Sinote sona se re: Kgopolو ye e dumelana ka mathoko ka moka le bokgelogi bja Pelagio; me e Iwantšhana le Lentšu la Modimo ka moka. Kantle ga moo Mangwalo a Makgethwa a re tshokologong ya motho Moya o Mokgethwa o šoma ka mokgwa o mongwe, o maatla kudu, wa bomodimo. Mo go Hesekiele go thwe: *Ke tlo le nea pelo e mpsha ka bea moyo o mofsa ka teng ga lena. Nameng ya lena ke tlo ntšha pelo yé ya lefsika, ka le nea pelo ya nama* (Hesek. 36:26).

8. Bakgelogi ba re: Modimo ga a šomiše maatla ka moka a gagwe go tswalweng la bobedi ga motho, gore a tle a obamiše thato ya motho ka maatla le ka mokgwa woo o ka se ganetšwego, gore a tle a dumele mme a sokologe.

Le ge go šoma ga kgaujelo ya Modimo, yeo a e šomišago go sokolla motho, go ile gwa phethagala, motho a ka na a ganetša Modimo le Moya o Mokgethwa ge o rata gore a tswalwe la bobedi. A ka mo ganetša ka gohlegohle gore a se ke a tswalwa la bobedi. Kganetšo ye motho a ka e phetha gantsi mme o a e phetha ka therešo. Ke go re go tswalwa la bobedi goba go se tswalwe la bobedi go maatleng a motho.

Sinote sona se re: Ka go realo bakgelogi ba tloša maatla a kgaujelo ya Modimo ao a re sokollago, mme go šoma ga Modimo yo maatla ohle go bušwa ke thato ya motho. Kgopolong ye e lwantšhana le thuto ya baapostola yeo e rego re dumela ka baka la tsebo ya *gore bogolo bja maatla a gagwe ke bjo bo kaakang go rena ba ba dumelago ka tiro ya maatla a gagwe a a tilego* (Baef. 1:19). Gape moapostola o rapela gore Modimo *a phethe ka maatla kgahlišo ya tše botse ka moka le modiro wa tumelo* (2 Bathes. 1:11). Mme Petro o re: *Ka mo maatla a gagwe a bomodimo a re seditšego ka tšohle tše di loketšego bophelo le borapedi* (2 Pet. 1:3).

9. Bakgelogi ba re: Mathomo a tshokologo a hlolwa ke go šoma gotee ga kgaujelo ya Modimo le thato ya motho. Mošomong wo wa tshokologo, 'kgaujelo ga e etelele thato pele. Ke go re Modimo ga a thuše thato ya motho ka maatla gore e sokologe, pele thato ya motho e ikemišetša ka boyona go sokologa.

Sinote sona se re: Thuto ye ya bakgelogi e šetše e kile ya lahlwa ke kereke ya bogologolo twantšanong ya yona le bokgelogi bja Pelagiose, go ya ka mantšu a a latelago a moapostola: *Ka gona ge, ga se taba ya yo a ratago, le ge e le yo a kitimago, ke ya Modimo yo a gagelago* (Barom. 9:16). Gape o re: *O beilwe ke mang ge o re: Ke phala yola? O swere eng se o sa kago wa se fiwa?* (1 Bakor 4:7). Me o boeleta o re: *Ke Modimo yo a le dirišago gore le rate le go dira thato ya gagwe* (Bafil. 2:13).

THUTO YA BOHLANO

KGOTLELETLO YA BAKGETHWA

1. Bao Modimo a ba bitšago ka go rata ga gagwe gore ba kopane le Morwa wa gagwe Jesu Kriste Morena wa rena, a bilego a ba tswalago la bobedi ka Moya o Mokgethwa, o ba phološa mmušong wa bokgoba wa sebe. Eupša bophelong bjo ga a ba phološe ka botlalo nameng le mmeleleng wa sebe.

2. Gona mo go hloga sebe sa bofokodi sa ka mehla. Mo medirong ya bakgethwa e mebotse-botse go na le bofokodi, go ba fa lebaka la go ikokobetša ka mehla pele ga Modimo, gore ba tšhabele go Kriste yo a bapotšwego. Ba fele ba bolaya nama ka thapele le ka go itlwaetša borapedi bjo bokgethwa. Ba fišegele go phethega le go tlogela mmele wa sebe gore ba buše le Kwana ya Modimo magodimong.

3. Ka baka la mašaledi a sebe se se lego bathong, le ka baka la dintwa tša lefase le Sathane, ba ba sokologago ba be ba ka se kgone go ema kgaugelang ye, ge ba ka tlogelwa maatleng e bona ka noši. Eupša Modimo o a tshepega, o tla ba tiiša ka lešoko kgaugelang yeo ba e filwego, mme o tlo ba boloka ka maatla go iša mafelelong.

4. Maatla a Modimo, ao ka ona a tiišago le go boloka badumedi ba nnete ka kgaugelo, ke a magolo moo a ka se kego a fenywa ke nama. Eupša ga se gore basokologi ka mehla yohle ba a hlahlwa, le go sepedišwa ke Modimo. Ka lebaka la molato wa bona, ka mabaka a mangwe ba tlogela kgaugelo le gona ba kgelošwe ke dikganyogo tša nama gomme ba di latele.

Ka lebaka leo ba swanetše go dula ba phakgame le gona ba rapela gore ba se išwe melekong. Ge ba sa dire bjalo, ba ka kgelošetšwa dibeng tše boima tše tšhabegago ke nama le lefase le Sathane. Ka dinako tše dingwe, ba kgelošetšwa moo, ka lebaka la tumelelo e lokilego ya Modimo. Go wa go kwisago boholoko ga Dafida, Petro le bakgethwa ba bangwe bao re botšwago ka ga bona Mangwalong a Makgethwa, go bontšha taba ye.

5. Ka dibe tše bjalo tše di tšhabegago badumedi ba galefiša Modimo, ba wela molatong wa lehu, le gona ba nyamiša Moya o Mokgethwa. Gape ba kgaotša go šomiša tumelo ka lebaka le lengwe, gona ba gobatša matswalo ka kudu. Ka dinako tše dingwe ba lahlegelwa ke temogo ya kgaugelo le letelele go fihla ge Modimo a ba phadimišetša gape sefahlego sa botswadi, ge ba boela tseleng ya nnete ka kgalemelo e lokilego.

6. Modimo yo a nago le kgaogelo ye e sa felego, ka lebaka la maikešetšo a kgetho ye e sa fetogego, ga a tloše Moya o Mokgethwawa gagwe ka botlalo go bao e lego ba gagwe, ešita le ge ba le ka gare ga sebe se hlomolang pelo.

Ga a ba lese gore ba we ka mokgwa o ba ka lahlegelwago ke kgaogelo yeo ba amogetšwego ka yona le maemo a tokafatšo. Le gona ga a dumele gore ba dire sebe se se išago lehung goba se se lego kgahlanong le Moya o Mokgethwawa. A ka se ke a ba tlogelela sa ruri ka gare ga tshenyego ye e sa felego.

7. Tabeng ya pele: Ge ba wela sebeng bjalo, Modimo o boloka peu ya gagwe ye e sa senyegego yeo ka yona ba tswetšwego la bobedi. O boloka peu ye gore e se ke ya senyega goba ya senywa.

Tabeng ya bobedi: O ba mpshafaletša tshokologong ka Lentšu le Moya wa gagwe ka nneta le ka maatla. Ka tsela yeo ba itshola pele ga Modimo ka lebaka la dibe tše ba di dirilego, gomme ba hlologela le go humana, ka tumelo le pelo e robegilego, tshwarelo mading a Mmoelanyi. Ka mokgwa o bjalo ba lemoga gape kgaogelo ya Modimo yo bjale ba kopantswego le yena. Ba leboga kwelobohloko le botshephagi bja gagwe gore go tloga bjale ba itšomele phologo ya bona ka mafolofolo a magolo le tšhabo le ka thothomelo.

8. Seo ga ba se humane ka mešomo goba ka maatla a bona, eupša ka kwelobohloko ya kgaugelo ya Modimo. Ga ba wele sa ruri go tšwa tumelong le kgaogelong. le gona ga ba dule sebeng go fihla mafelelong goba go fihla ba lahlega.

Ge nkabe go be go etšwa go bona mabapi le tše boletšwego go be go ka se be bonolo, fela go be go tla direga kantle le pelaelo. Eupša ka gore ga go tšwe mo go bona go ka se tsoge go diregile. Ka mehla yohle morero wa gagwe ga o fetoge, tshephišo ya gagwe ga e senywe, pitšo ya gagwe go ya ka morero wa gagwe e ka se ke ya fetolwa, mešomo e lokilego, merapelelo le pabalelo ya Kriste, tšohle tše di ka se ke tša feditšwa maatla. Go bjalo, le go swaiwa ka Moya o Mokgethwawa go ka se ke gwa tlošwa goba gwā senywa.

9. Badumedi ba ka ba le bonnete bja pabalelo ye ya ba ba kgethetšwego phologo le tiišetšo ya badumedi tumelong. Ba na le bonnete go ya ka tekanyo ya tumelo yeo ka yona ka nneta ba dumelago gore ke ditho tša nneta tše phelago tša kereke. Ka bonnete bjo ba dumela gape le gore ba tla dula bjalo e le ditho le gore ba na le tebalelo ya dibe le bophelo bjo bo sa felego.

10. Bonneta bjo ga bo tšwe kutollong ye nngwe ya mohuta wa yona yeo e lego ka ntle ga Lentšu la Modimo, eupša bo tšwa tumelong go dikholofetšo tša Modimo, tše a re utolletšego tšona ka botlalo Lentšung la gagwe go re, tshediša. Gape botšwa bohlatseng bja Moya o Mokgethwa, woo o hlatselago gammogo le moya wa rena gore re bana le majalefa a Modimo (Barom. 8:16,17). Tabeng ya bofelo, bo tšwa phegelelong e tiilego e kgethwa ya go ba le letswalo le lebotse le mešomo e mebotse.

Ge nkabe batho ba ba kgethilwego ke Modimo mo lefaseng le, ba se na le matshedišo a tiilego a gore ba tla rua phenyo le tshephišo ye e sa tšhilafalego ya letago le le sa felego gona e be e tlo ba ba madimabe go feta batho bohle.

11. Gape Lentšu la Modimo le hlatsela gore mo bophelong bjo badumedi ba lwa le dipelaelo tše mpe tša mehutahuta, le gore ge ba tsena melekong e boima, ga se ga ntši mo ba lemogago tshepho ya tumelo e tletšego le bonneta bjo bja kgotlelelo.

Eupša Modimo, Tate wa matshedišo ka moka, ga a dumelele gore ba lekwe go feta maatla a bona, ka gobane o ba fa moleko gotee le tsela ye ba ka tšwago go wona (1 Bakor. 10:13). Ka Moya o Mokgethwa o ba fa gape bonneta bja kgotlelelo.

12. Go tloga go sa kgonege gore bonneta bjo bja kgotlelelo bo ka dira badumedi ba nneta goba batho ba ba ikgogomošago le gona ba iphelela go ya ka mo ba ratago ka gona.

Gabotsebotse, bonneta bjo bja kgotlelelo ke modu wa nneta woo go ona go tšwago boikokobetšo, poifo ya bongwana, boineelo bjo tletšego go Modimo, bopelo-telele dintweng tšohle, dithapelo tše dirwago ka phišego, go ema ka go tia ka tlase ga sefapano le go bolela nneta le go dula lethabong la Modimo.

Gape go nagana ka ga taba ye go kaone gobane e šušumetša badumedi gore ba bonagatše tebogo e swanelang ya ka mehla yohle le mešomo e mebotse. Lentšu la Modimo le re fa mahlatse a bjalo le mehlala ya ba bakgethwa.

13. Fela, go badumedi bao, ka morago ga go wela sebeng, ba ilego ba tsošwa, bao go bona go ilego gwa tsošološwa gape kholofelo mo kgotlelelong, ga go na go se hlokomele therešo goba go se šetše ga borapedi. Go bona go na le kganyogo e kgolo ya go sepela ka šedi ditseleng tša Morena.

Ditsela tše go tloga mathomong di lokišitšwe ka mokgwa wo e lego

gore ge ba sepela mo go tšona ba tla ba le bonnate bja kgotlelelo. Sefahlego sa Modimo yoo bjale ba boelaneng le yena, se ka se sa ba furalela bjalo ka pele ge ba be ba hlompholotše kgaugelo ya Tate. Ge ba ka furalelwa ke sona ba tla wela ditlhokofalang tše fetišago tša letsvalo. Ke ka gobane go badumedi go lebelela sefahlego sa Modimo go bose go feta bophelo, eupša go furalelwa ke sona go baba go feta lehu.

14. Go kgahlile Modimo go thoma mošomo wo wa gagwe wa kgaugelo ka go rena ka mokgwa wa go tsebatša ebangedi. Ka mokgwa o bjalo o a o boloka, o o tšwetša pele, gomme o a o phethagatša ka go kwa, go bala le ka go naganišiša ka ga ebangedi, le ka kgothatšo, dikgalemelo le ka ditshephišo le ka go šomiša disakramente tše kgethwa.

15. Thuto ye ya kgotlelelo ya badumedi ba nnete le bakgethwa, le ya go ba le nnete tabeng ye, Modimo o e utollotše ka bottalo Lentšung la gagwe, le gona o e gatišitše dipelong tša badumedi gore Leina la gagwe le tumišwe le gore badumedi ba homotšwe.

Badiradibe ga ba kwišiše thuto ye; Sathane o e hloile, lefase le ya e kwera, bahlokatsebo le baikaketši ga ba e šomiše ka tshwanelo, gomme meoya e lahlegilego e ya e Iwantšha. Eupša Monyadiwa wa Kriste o ile a rata thuto ye ka mehla bjalo ke letlotlo la bohlokwa bjo bo sa lekanywego gomme a e šireletša ka kgotlelelo.

Modimo o tla hlokornela gore kereke le yona e dire bjalo ka moso. Kgahlanong le Modimo ga go leano le le tee leo le ka šomago, ešita le maatla a tlago ka ntwa kgahlanong le Modimo a ka se dire selo. Tlhompho le letago di tlišwa go Modimo o tee, e lego Tate, Morwa le Moya o Mokgethwa go iša mo go sa felego. Amene.

TATOLO YA BOKGELOGI MABAPI LE THUTO YA KGOTLELELO YA BADUMEDI

Bjale ka ge thuto ye e hlalositšwe gabotse ka lenaneo, sinote se lahla bokgeologi bja batho ba ba rutago tše di latelago:

1. Bakgeologi ba re: Kgotlelelo ya badumedi ba nnete ga se tholwana ya kgetho ya Modimo goba mpho ya Modimo yeo e humanwago ka lebaka la lehu la Kriste. Ba re ke lebaka la kgwerano e mpsha leo motho, ka go rata ga gagwe, a swanetšego go le phetha, pele ga kgetho ya gagwe ke Modimo le tokafatšo ya gagwe.

Sinote sona se re: Lentšu le lekgethwa le hlatsela ka mehla gore kgotlelelo ke tholwana ya kgetho ya Modimo le gore e fiwa ba ba

kgethilwego ka lebaka la maatla a lehu le tsogo lemerapelelo ya Kriste: *bahlaolwa ba se fihletše; ba bangwe ba thatafadišwe* (Barom 11:7), le Barom. 8:32-35: *Yena yo a sa kago a tsebafa le Morwa wa gagwe wa ruri, eupša a mo gafa ka baka la rena ka moka, a ka lesa bjang go re nea tšohle le yena? Ke mang yo a tlago bea bakgethwa ba Modimo molato? Ke Modimo e a lokafatšago. Ke mang yo a tšuago? Ke Kriste e a hwilego, gomme se se fetago seo ke ge a tsogile, gape ke yo a lego letsogong le letona la Modimo, gape ke yo a re rapelelago. Ke mang a kago re aroganya le lerato la Kriste?*

2. Bakgelogi ba re: Modimo o fa modumedi maatla a lekanego gore a kgone go kgotlelela. Gape Modimo o ikemišeditše go boloka maatla a go modumedi, ge fela modumedi a phetha boikarabelo bja gagwe. Le ge go dirilwe tšohle tše bohlokwa gore motho a kgotlelele tumelong, e lego tše Modimo a ratago go di šomiša go boloka tumelo ka tšona, e sa ntše e le thato ya motho yeo e ikgethelago gore na o tla a kgotlelela goba aowa.

Sinote sona se re: Go tloga go le molaleng gore kgopoloye ke bokgelogi bja Pelagiose. Mola e dira thato ya motho go ba e lokologilego, e be e ba dira ba hlakolago Modimo tlhompho ya gagwe. Gape thuto ye e twantšanong le thuto ya ebangedi yeo e bolelago taba e tee ka mehla, e lego gore motho ga a na selo seo a ka ithorišago ka sona, le gore thorišo yohle, ka baka la modiro o mobotse, e lebišwe kgaugelong ya Modimo fela. Gape thuto ye e twantšanong le polelo ya moapostola ge a re:

Yena o tlo le tiiša go fihla bofelong, gore le se be le bosodi ka letšaiši la Morena wa rena Jesu Kriste (1 Bakor 1:8).

3. Bakgelogi ba re: Badumedi ba nnete le ba tswetšwego la bobedi ba ka tšwa tumelong ye e lokafatšago, le kgaugelong le phološong go fihla bofelong. Ba ba tšwelego ka mokgwa o bjalo ba timela go iša mo go sa felego.

Sinote sona se re: Kgopoloye e hlokiša kgaugelo ya tokafatšo, tswalo ya bobedi le pabalelo ya ka mehla ya Kriste maatla. Gape e twantšanong le mantšu a a gateletšwego a moapostola Paulo ge a re: *Kriste o hwile ka baka la rena re sa le badiradibe. Ke gona ka go fetiša ka kudu re tla phološwa bogaleng ke yena, ka ge re lokafadišwe mading a gagwe* (Barom. 5:8,9). E, twatšanong gape le mantšu a moapostola Johanne ge a re: *Mang le mang yo a tswetšwego ke Modimo ga a dire sebe gobane se a se filwego ke Modimo se duše mo go yena, gomme a ka se kgone go dira sebe gobane o tswetšwe ke Modimo* (1 Joh. 3:9). Ka mokgwa o bjalo, kgopoloye e twantšanong le mantšu a Jesu Kriste ge a

re: Ke nea dinku tsa ka bophelo bjo bo sa felego. Di ka se ke tsa tahlega go iša go sa felego, gomme ga go yo a tlago di utla seatleng sa ka. Tate yo a nneilego tšona ka yo mogolo go bohole, mme ga go yo a kgonago go di utla seatleng sa Tate. (Joh. 10:28,29).

4. Bakgelogi ba re: Badumedi ba nnete le ba tswetšwego la bobedi ba ka dira sebe se se išago lehung go ba sebe sa go ba twantšanong le Moya o Mokgethwa.

Sinote sóna se re: Kgopolu ye ga e amogelwe gobane Johannes ge a se no bolela go 1 Joh. 5:16,17 ka ba ba dirilego sebe se se išago lehung, gore ba se ke ba rapelelwa, ka pela o oketša ka mantšu a temana ya 18 a a rego: *Re tseba gore mang le mang yo a tswetšwego ke Modimo, ga a dire sebe* (ke gore se se išago lehung), eupša yo a tswetšwego ke Modimo, o a itshwara mme yo mobe ga a mo kgwathe (1 Joh. 5:18).

5. Bakgelogi ba re: Bophelong bjo motho o šitwa go ba le bonneta bja kgotlelelo ye e sa tlago ge a sa humane kutollo e itšeng ya bohlokwa.

Sinote sona se re: Go ya ka thuto ye ya bakgelogi, badumedi ba nnete ba amogwa khomotšo e tiilego yeo ba nago le yona. Thuto ye e tliša gape dipelaelo tsa balatedi ba mopapa ka kerekeng. Lentšu le lekgethwa lona ga le bee bonneta bjo godimo ga kutollo e itšeng ya bohlokwa, ye e sa tlwaelegago, eupša godimo ga maswao ao bana ba Modimo ba tsebjago ka ona, le godimo ga ditshephišo tše sa fetogego tsa Modimo. Taba ye e hlalošwa kudu ke moapostola Paulo mo go Barom. 8:39, ge a re ga go sebopša le se tee seo se ka kgonago go re aroganya le lerato la Modimo le le lego mo go Kriste Jesu Morena wa rena. Johannes le yena o re: *Gomme yo a bolokago ditaelo tsa gagwe, o dutše mo go yena, mme yena Modimo o dutše mo go yena. Se re tsebago ka sona gore o dutše mo go rena, ke ka Moya wo a re neilego wona* (1 Joh. 3:24).

6. Bakgelogi ba re: Thuto ya bonneta bja kgotlelelo le bja phološo go ya ka semelo sa yona, e dira gore motho a se hlwe a tshwenyega ka sebe. Gape e kotsi boineelong bja motho go Modimo, mekgweng e mebotse, dithapelang le medirong e mekgethwa. Anthe go a kgahliša ge motho a belaela ka ga kgotlelelo le phološo ya gagwe.

Sinote sona se re: Ka go realo bakgelogi ba bontšha ka mehla gore ga ba tsebe maatla a kgaugelo ya Modimo le tšhomo ya Moya o Mokgethwa o dutšego go modumedi. Gape ba twantšanong le

moapostola Johannes yo ka mantšu a gagwe a gateleLAGO, lengwalong la gagwe la pele, gore: *Barategi, bjale re bana ba Modimo, gomme se re tlogo ba sona, ga se ešo sa bonagala, fela re tseba gore mohla a bonagalago re tla swana le yena, gobane re tla mmona ka mo a lego ka gona. Gomme mang le mang yo a nago le kholofelo ye go yena, o a ikgetha, bjalo ka ge le yena a kgethegile* (1 Joh. 3:2.3). Go feta moo, bakgelogi ba latolwa ke mehlala ya bakgethwa ba Testamente e Tala le e Mpsha. Le ge ba be ba na le bonne te bja kgotlelelo le ya phološo ya bona, ba ile ba kgotlelela dithapeleng le mešomong e mengwe ya tumelo.

7. Bakgelogi ba re: Tumelo ya ba dumelang lebakanyana, fela e fapané le tumelo e lokafatšago le e phološago fela ka botelele bja nako yeo motho a nago le yona.

Sinote sona se re: Go Mat. 13:20 le Luk. 8:13 le ditemana tše di latelago, Kriste o bolela gore go na le diphapano tše tharo-magareng ga bao ba dumelang lebakanyana fela le badumedi ba nnete. O re:

Ya pele, ke gore ba ba dumelago lebakanyana fela ke ba ba amogelago peu makgwareng, eupša badumedi ba nnete ke ba ba e a amogelago mobung o mo botse goba dipelong tše botse.

Ya bobedi, ke gore ba ba dumelang lebakanyana fela ga ba na le medu, eupša badumedi ba nnete ba na le medu e tiilego.

Ya boraro, ke gore ba ba dumelang lebakanyana feela ga ba enywe dikenya, eupša badumedi ba nnete ba enywa dikenya ka go tia goba ka kgotlelelo ka dikelo tše fapanego.

8. Bakgelogi ba re: Go a kgonega gore motho ge a se no lahlegelwa ke tswalo ya bobedi yeo a bego a šetše a e humane, a tswalwe gape ka lefsa. Taba ye e ka ipoeletša gantši.

Sinote sona se re: Ka thuto ye, bakgelogi ga ba amoge go se senyege ga peu ya Modimo yeo ka yona re tswalwago lefsa. Ka go dira bjalo ba twantšanong le bohlatse bja moapostola Petrus ge a re: *Le ba ba tswetšwego lefsa, e sego ka peu ye e fetago, eupša e le ka ye e sa fetego* (1 Pet. 1:23).

9. Bakgelogi ba re: Ga go mo Kriste a ilego a rapelela badumedi gore mo tumelong ya bona ba kgotlelele ba se na sekodi.

Sinote sona se re: ka go realo bakgelogi ba twantšanong le Kriste ka sebele, yo a rego: Petros *ke go rapeletše gore tumelo ya gago e se ke ya fela* (Luk. 22:32). Gape ba twantšanong le moebangedi Johannes, yo a hlatselago gore Kriste ga a ka a rapelela baapostola fela, eupša o rapeletše le bohole bao ba tlago dumela ka mantšu a bona: *Tata yo*

mokgethwa, boloka leineng la gago bao o nneilego bona... Ga ke kgopele gore o ba tloše lefaseng, eupša gore o ba lote bobeng (Joh. 17:11,15,20).